

Opuscula

Opuscula

VIA JURIS
AD DOCTORALEM

Juridici Honoris Lauream,

PER LABORES ET MERITA

Perillustriſſiſſimi & Admodum Reverendi Domini

D. M. STANISLAI
KUTLINOWSKI,

Utriuſq; Juris LICENTIATI ac PROFESSORIS, Ec-
cleſiarum; Collegiatæ S. MICHAELIS in Arce Crac:

DECANI, in Koniuſza CURATI;

D. V. M.

PERILLVSTRI & REVERENDISSIMO DOMINO

D. M. JOANNE
LUKINI.

Utriuſq; Juris DOCTORE & Professore, ejusdemq;
Facultatis DECANO, Eccleſiarum; Cathedralis Crac:

CANONICO, Collegiatarum; SS. OO. Crac: CAN-

CELLARIO, Viſlicienſis PRIMICERIO, Parochialis

Sławkoviensis PRÆPOSITO, Contubernij

Jagelloniani PROVISORE,

Utriuſq; Juris DOCTOR

ſolemniter renuntiaretur,

M. JOSEPHO GREGORIO POPIOLEK,

Phil: DOCTORE & Professore, Collega Minore, S. ADALBERTI

in Circulo Crac: PRÆPOSITO, Strzałkoviano Geometra Jurato,

ad publicas gratulationes

panegyrica penna

DEMONSTRATA.

Anno Domini 1733. Die 9. Menſis Februarij

CRACOVIAE TYPIS ACADEMICIS.



ODE VOTIVA.


Quod circularis per peripheriam
Mundi, per æquor, per juga montium
Excella ferris ad remotam
A Lechia celer usq; Thulen

Subsiste famæ Numen amabile !
Subsiste quæso ! sique placet vide;
Quàm pulchra, quàm datur peractis
Pro meritis copiosa merces.

Cernas, ut aurô gloria clarior
Lucente, necnon laudis adorea
Viros coronat eruditos,
Quôve super trahit astra calle.

Fortuna gressus ambiguo pede
Periculosos mille quidem terit;
Sed quâ in tholos honoris itur,
Una nisi via Juris extat.

Hanc præter unam, (climata gentium
Nôrint & Indi, nôrit Arabs niger)
Nullum ad superna Dignitatum
Posse viâ meliore duci.



VIA JURIS AD DOCTORALEM Juridici Honoris Lauream.



Ens hominum, pelagus voto-
rum, quamvis frequentibûs
ferveat procellis, ut commif-
sa eventuum navigia, coro-
nata gloriæ promontoria in-
veniant; sæpè tamen non
prævidet per acroceraunia &
syrtis, per scyllas charyb-
desq; ejusmodi quæri debere provinciam. Fames
gloriæ cuius cordis non inest præcordijs? cuius
palatum non urit? Omnium certè illicium est,
cunctorum appetitus accendit. Sed portioni tan-
tæ non apud singulos iusta condimenta invenit.
Placet Mundi Domitoris Nomen; sed ad subscri-
bendum ipsi, ferrati calami, cruentatæ sepiæ exo-
sæ, pectoris robur concidit, manus tremula pa-
vet, contremiscit. Placent Cæsarum elephant, Pompejorum
Leones: aliorum cervi, aliorum
subacta Regum quatuor colla cum triumphante
in Capitolium Appia plurimorum amor sunt; sed
indomitæ fortitudo timenda, rarò elucet fervore,
rariore exemplo. Quippe ad immortales ignes,
multi clarere etiam cum Herostratis poscunt; cum
sepultæ Dianæ bustum id, non annosos phanices,
sed sæculis abominabiles noctuas parturiat, pro-
dat.

dat. Antiochos in luxu opum, in lascivienti fortuna ad æmulandum quærunt, contra fortia (velut ille adversus Latium) cristas erigendo, jubas Leonum simulant, clypeos minantur & castra, ad incudem malorum, malleum parant & ignem; cum tamen cereus in arduis conatus, vix ardore belli adustus in otia diffuat, mollibus inter strata rosaria deditus, durior regi lorica detestetur: chalybeatos abjiciat procul mucrones: pro tubarum Martis clangore, Nympharum cantus adaptet, stratagema ex hoste speratum; ex se ipso, sæva fugiente prælia ponat: vestigia montosi, ac proinde monstrosi partus linquendo, pro victoria, ritum & fabulam sæculorum excitet.

Enimverò Magnorum in Orbe Virorum, quibus probitas cunabula struxit, eademq; gloriæ ac honoris mensuram posuit, ad Augustalia Honorum, alia semita est, & gressus diversi. Amant quippe cæteris eminere; sed operosis virtutibus: cupiunt inter Soles videri, sed laborum prodigiò. Ad coronam eorum Olympiacus ludus est non lusus: idem in certando conatus, qui Stentoris cum Mercurio, aut Arachnes cum Minerva. Fortes fortibus in altiora nituntur; ut generosiore spiritu famam famæ extinguant: ac è vestigio laxari in omnem fortunam animi, spectandæ fortitudinis, posthumæ ætati, exemplaria statuunt. Exactis aliorum laboribus oderunt coronari. Trahitur ad Hectoris ausus puer Ascanius: dedecet Scipionem Æmiliorum tantum partis celebrari triumphis. Audet etiam indomitam ire in Africam; ubi Terrore Latij superato, ad Patrium Nomen Africani gloriam adjungeret.

Tantum ad coronam iter, etiam in Regno Sapientiæ triviale est, docta intrantibus Lycæa in primo

primo liminum ingressu obvium. Floridâs quidem
Literarum confutum ordinibûs, non tamen absq;
puncturis, per quas aculeatus labor in summa erudi-
tionis juvat ire; ibi palmares laureas, ferta virentia,
demonstrando. Hinc etiam exosum est glori-
am quarentibus, celso eminere in loco, sinè lu-
ce sapientiæ: solô æstimari, non tale Scientiæ.
Negant parvos Surculos, in ingentes assurgere
posse Platanos, in cedros excrecere, ni sudorife-
ro frontis rigentur stillicidiô, acutiori mentis acu-
mine, velut strictiori dolabrâ sæpius purgentur,
scindantur, à nocivis depurentur stolonibus. Ne-
gant Parnassios Apollinis Lares, ni prius alti diffi-
cultatum caucasi superentur. Fructus alios non
poscunt, quàm laboris: dulcores alios non præ-
libant, præter eos; quos durissimus molestiarum
ad literas cortex effundit. Coronas alias non su-
munt, præter collectas ex spinis laborum,
operosæ virtutis artificiô & industriâ contextas.
Hoc primo à Te alta mente reconditum PER-
ILLUSTRIS DOMINE NEO DOCTOR; qui
per amplis in Orbe Literario laboribûs, numerosis
vitæ Tuæ virtutibûs, elegisti prius mereri hono-
rem, quàm habere. Edoctus, experienciâ rerum
magistrâ, sinè textore suo purpuram non rube-
scere, annulum sinè malleo non quenquam orna-
re; per labores & merita, ad Doctoralem Lau-
ream viam Juris tutissimam haberi. Permit-
te id ampliori describere calamô. Quidquid
ille exprimet, brevis emphasis erit, meritorum
Tuorum breve compendium: at profusæ in Te
Honoremq; Tuum venerationis & plausum à
me debitorum veram tractabit materiem.

Ea est laboris potentia, ut licet ubivis loco-
rum valeat, ubiq; æstimari mereatur, ille tamen

B.

faci.

facilius ducat ad coronam, qui novit generosiores enutrire animos: viros, jam alias lectissimis ornatos decoribus, amplius decorat; illam sibi præfigendo sedem, ad quam per excelsa & abrupta, aut carpendum iter aut volandum. Labor, quò gravior est, eò apud Orbem ponderosior: ad majores virium impensas, acceptabilior: plus æstimatur per prodigos conatus, intensus; quàm remissò studio delicate tractatus. Improbis est, qui omnia vincit, gloriosius attollit sui cultores; dum jugo molestiarum pressos profundius deprimat, nec aliter depresso erigendo, nisi erigat deprimendo. Unde est quod antiquus Romanorum Status servabat, non ad quemcunq; triumphum, Civicam aut Navalem enasci debuisse. Millies vitæ discrimen adeundum erat, per sæva hostium funera posteritati fænerandum; ut pretiosum captatæ gloriæ pignus sumeretur. Labor viam Juris ad Laureas, ad immortales corymbos recludit; sed iis vel maximè, qui non verentur invia pro obviis habere, per aperta rerum pericula duci, utramq; fortunam subire; passum hunc strepitum juris vocitando; per quem processus in via juris ad coronam formandus. Non desunt enim tituli & leges, digesta & codices, ac alia in via hac causam honoris legitimam in sæculorum fastos inducentia. Animi vigor, dum magna audere concitat, citat ad Tribunal præmiatricis virtutum justitiæ. Et ut ad propositum, de Viris inter Literas clarissimis loquar; quotquot erudita Lycæa, Doctorales Cathedræ, præclara scientiarum recensent dogmata, quotquot subtiliori dilemmate gloriosè gesta comprobant; tot digesta revolvunt, codices producant, capitula annotant, rem ipsam in tantum evincentia; ut lege jubente non disputante,

tante, cognatus honoribus labor, Orbis in suam partem sententiam trahat. Quot habitû contractæ lucubrationes, docto è cerebro partus progeniti, atq; hinc emanantes encomiorû congeries; tot canones, tituli, paragraphi per Capita distributi; unde in omni foro plausus, in omni Subsellio æstimatio, in omni Judicio legitimitas processus, per laborem ad Lauream decernitur, debita operarijs merces, conceditur, redditur.

Hoc in Te probasti Perillustri Domine NEO DOCTOR, qui animi præstantiâ suadente, virium urgente fortitudine, cuncta vitæ Academicæ Olympia, per duros & acerbos disposuisti labores. Etenim si Professorales domi & foris peractos recensuero, multum est, quod intendam, nedum eos brevî hoc condignè describam eloquiô. Egiſti ſemper, quod Laureatos decet: ad utrumq; in Philoſophia elevatus gradum, eam ſervabas ſcientiarum eminentiam, quæ Te in quavis ſtatione præſtantiorem aliis redderet Profefſorem. Præſertim cum in Orbe Academico, ad literarum culturas continui redeant cum luce labores, fructus honoris onus, laborumq; præmium labor ſit; illico cum Toga Academica induiſti genium illum, qui Te ſorte quavis paratum certare oſtenderit. Certe enim prælectiones Philoſophicæ, reſonantia eruditione pulchrâ Lectoria, ſedata lectioni donata tempora ornabantur à Te eâ dexteritate, quæ optimis ingeniſta eſt: eâ alacritate; quæ ſtudioſiſſimis Artium cultoribus convenit. Libris accumbere, primum oblectamentum mentis erat; utpote à quibus proveniens pallor, cum candore Academico Tibi nimis intimo plurimum concordabat, uterque illorum pari aviditate ſeſe ingererat Tibi; à quo pari ingenio contrahebatur,

tur, eos imitante; qui inextincto sapientiæ capti amore, solidas diebus noctes maritare sueverunt; ad solis labores, & ad Cleantū lucernas, illustriores prodituri. Tuum erat non solum proprios tolerare, ast etiam alienos portare æstus; gnarus optimè non soli Atlanti Divinos deberi honores, quod succolum Orbi suo egerit; sed & Herculi, qui & propriis cæteros superavit factis & vicarium Atlanteo ponderi supposuit humerum. Hoc tunc in publica eruditione, quid in privata? ad quam pulcherrimæ flos juventutis concurrebat; ut heliotropij more, Te solem proprium, pietate doctrinâ, ac omnigenâ imitaretur virtute. Evenit id in SZEMBECIJS, SMIETANCIJS, ORACZEWSCIS, ac alijs; qui Te fontem suum quoties hauserunt, toties coronârunt. Sicut & ad præsens coronant: nam in Republica Polona Viri Dignissimi, per palatum Procerum Regni, cui permagè placent, luculenter demonstrant, quàm lapidissimos scientiarum fructus ad Aulas eorum tulerunt, à Te cum maturitate, nectare suavitatis morum desumpto. Tanta vitæ Tuæ comitas, in educandis Aquilæ Sarmaticæ pulis sollicitudo, quemadmodum ex se ipsa satis exacta & accommodata fuit; ita Te eousque deduxit; ut majori studentium Legioni, ampliori Juventutis flori excolendo, præfici, instituerit. Hinc Contubernium Staringelianum, conjuncta Ordinum Academicorum vota ultrò tradidere; ubi aliquot annorum Senior, quamvis ex titulo & dignitate, commisso præfuisi gregi; magis tamen permaturis moribus pietati ac modestiæ junctis talem Te esse probasti. Nihil enim boni, collati promunt tituli; si ab eis, officiosa autoritas longè distat; ac veluti actiones rectæ rationi dissonæ

à re-

à regula perfectionis discrepant, elongantur. Col-
lata dignitas, velut medentium virtus est; quæ
dum per symptomata nocivos non abolet hu-
mores, ô quàm speciosum est in rebus inane! cum
athomis tumescere dignum, serenam perturbatur-
um auram. Primam sapientiam timere DEUM,
revereri Majores, seriò intimare, principale Se-
nioratus Tui regimen erat: cui, quia parere para-
ta adstat eruditio; hanc peramplè tenellis imbibisti
plantis. Nil jucundius erat Perillustri, Clarissi-
mo & Admodum Reverendo Domino M. MAR-
TINO KUROWSKI, S. Th: DOCTORI & PROFES-
SORI, Ecclesiarum Colleg: S. FLORIANI ad Crac:
ac Vielicienti PRÆPOSITO; Contubernij illius
Provisori; quàm gremium illud studentium; ma-
nu Tua optimè gestum spectare. Unde etiam
MARTINUM verè se esse monstravit, in Te pro-
sequendo; cujus beneficia in pectore grato, velut
in rasa tabula, sicut indelebili caractere nota-
bas; sic Doctoralem in Theologia ascendenti Ca-
thedram, Panegyricâ famulabaris pennâ. Ita ta-
men, ut etiam in alijs celerem proferres prom-
ptitudinem: nam collapsum in partibus Con-
tubernium, refarcire proponenti; manus adiutrix
fuisti. Eò laboriosius, quò sæpius imposita totius
Almæ Universitatis negotia aliò avocabant. Ete-
nim Vice Procurator, vel ut expressiore utar no-
mine, Syndicus Universitatis electus, grandem Rei-
publicæ Literariæ bajulabas molem, nec tamen
alijs deceras officijs, quinimò & à Professorali mu-
nere; nec transverso ungue recedere, totis curabas
viribus. Si tempestatem malorum bono communi
nafragam exoriri vidisti; Tua sollicitudo erat,
non sanitati, non vitæ parcendo, etiam ex ipsis
fontibus erumpenti, fortia adaptare obstacula;

C. vel

vel si hæc subsistere nequibant, jam ultra limites
effusæ procellæ retrahendæ, Tua opponere peri-
cula. Honoris Academici conservatio, non minus
Tuo inerat amor, quàm sors Tua & felicitas;
non Tibi sed ejus commodo successus fortunatos
cumulans; etiam vivere Tuum, integritati ejus
consecrabas. Crevit hic amor in Te feliciter, do-
nec amplissimæ benevolentia omnium contexe-
rit coronam, votis Tuis ad amissim aptaverit. Et
principaliter fortissimi rerum Academicarum
Atlantis, jam decies Sceptra Literaria sicut &
nunc feliciter tenentis Magnifici Perillustri &
Reverendissimi Domini M. MARTINI
WALESZYNSKI, Sacræ Theol: DOCTORIS
& Professoris, Collegij Majoris SENIORIS PA-
TRIS, Ecclesiarum Cathedralis Cracov: CANO-
NICI, Montis S. GEORGIJ in Scepusio &
Præmykoviensis PRÆPOSITI, Contubernij
Hierosolymitani PROVVISORIS, Canonizatio-
nis B. JOANNIS CANTIJ PROCURATO-
RIS, Librorum per Diœcesim Cracoviensem
Ordinarij CENSORIS, Studij Generalis Univer-
sitatis Cracoviensis PROCANCELLARIJ ac Vi-
gilantissimi RECTORIS.; qui Te plurimîs proba-
tum documentis, sincero erga se ferventem candore,
non minus Paternò prosequabatur affectu, quàm
Regiûs Alexander suum Ephestionem favoribus.
Non abstinet & ad præsens ab illis; cui fluentes
gemmeo cæli gratiarum pulvere horas, dies absque
adversitatum nube, menses ab inconstantibus Lu-
næ laboribus longinquos, quia felicissimos, in lon-
gævos precaris annos; teste pennâ scribentis. Mi-
nor Collega factus, Tibi quidem minimus videri
volebas, qualem modestia & humilitas in omni-
bus præsentissima pingebat Universo; sed solertia
men-

mentis, felix in resolvendis rerum difficultatibus
activitas, cæteris præstantiorem efferebat: non se-
cus, ac sub velo Timantis conclusæ virtutes; ex
quibus nulla tantopere latuit, ut eam Apellis pe-
nicillus non posset depingere, veram conservando
simmetriam. Quare Regio Jagellonianum Contu-
bernium Tuo regimini subjectam; ubi Senior, bo-
no illius loci providus, nihil de teneritudine ani-
mi remittendo, de rigore juventutis educandæ,
æquanimitate servatâ, adimendo nihil; plantulis il-
lis, in vireto Literario, adeò felicem instillabas ro-
rem; ut optimæ spei herbam porrigentes, in flo-
rem Ecclesiæ ac Patriæ creverint venustissimè,
magna eorum ornamenta futura. Altiores dein de
Te luctabantur honores: Pinczoviense Solum, la-
boriosum in Vinca Literaria Triptolemium flagra-
bat; ut DIRECTOR illius, ad GONZAGARUM
AQVILAS, sublimius Nomen ejus efferres. Aliun-
de verò Decanalis Facultatis Philosophicæ trahe-
bat Purpura; ut Te Principem Philosophantium
investiret. Diremit litem conspiratus Patrum, ac
Fratrum affectus; cordibus eorum medullitus in-
hærens, nè oculis quoq; eripereris; in Decanali Se-
de Te urserunt locari; firmiter concludentes, nec
Tui animum, nec Facultatem in Purpura hac ru-
bore confundendam; cui egregias dotes ad deco-
randum applicâsti. Equidem Purpura hæc ex se
quidem satis ornata, nitida, loco Principe digna;
cæterum nemo est, qui eâ indutus, interdû roden-
te non atteratur tincâ, molestos non effundat su-
dores, rubore ejus non palle scat. Hanc tamen si-
cut alacrî excepisti humerò, sic fortiore gessisti; ut
sub tanto munere & onere indefessus Athleta vi-
dereris. Felix in enucleandis Philosophiæ Thesi-
bus, in Professoribus fovendis graciosus, quàm u-

ber sit Jagellonis Manipulus in Laureatis tredecim Viris ostendisti.

Ultimam verò instantiam in Via Juris ad Lauream laboribus & meritis debitam, in hoc Purpurato Decanalis Honoris Subsellio non præfixisti. Etenim ulterior causæ prosecutio, amplius de Republica Literaria merendi Tibi indicta erat; dum non dum finito Principe illo Officio, ad Augustum Sacræ Themidis Archilycæum, Collegium nempe Juridicum, nova Tecum intentata actio, novus formatus Processus. Ur sit Divinior Astrea; ut inter cætera sui Luminaria Cœli, Sidus non postremum fulgeres: & effecit, ut Collega Juridicus factus, tantum præcelsâ Juris scientiâ inclaresceres; quantum studiosa ejus ingenia, profundæ vastitate mentis in commodū publicum derivare quærebāt. Sive sacros explanabas Codices, sive Civilia resolvebas digesta; regula Tuæ Professionis exiit, abdita Legum arcana recludere, nodos resolvere, facilitare, ita; ut quotquot Tyrones Te Professore docta Juris prælibârunt dogmata, Athenas non sciscitando in peritissimos evalerint Licurgos ac Solones. Adfuit ejusmodi magnarum qualitatum æstimatio, censuerunt Proceres Academici Te quibusvis supparem esse munijs; illico Actorum Rectoralium Notarius assumptus, ab alijs intimo cordis cubiculô receptus, omnem affectuū Oeconomiam commissam habuisti. Quod manifestavit alium illud Literarum Præsidium, grande Decus Columnenq; rerum Perillustreis olim & Reverendissimus D. M. ANDREAS KRUPECKI, Utriusq; Juris Doctor, Canonicus Cathedr: Crac: Almæ Universitatis Senior Pater, Procancellarius & multoties Rector; utpotè non tantum in vita sua Te Paterno fovens amore; sed qui etiam
ulti-

ultimam sui voluntatem moriendo Tibi reliquit. Huic Tu profusis licet parentabas lachrymis; præcavebas nihilominus, nè tanti Patris in corde clienti memoriam extingueres. Foves in pectore grato vivam Ejus imaginem; cui devota ad Superos suspiria, cum vita dedicasti.

Censuit tandem amor universi, gloriam Academicæ Gentis, amplius per Te promovendam: decrevit viam meritorum Tuorum, non sub uno climate terminandam, non uno sub Jove deducendam, tractandam: adeoq; ad Literarum Fontem, sub Minori Lechiæ Polo probatum, in Majoricam, Colonix Posnanienſis expedivit Directorem. Suscepisti officium satis onustum & arduum, intrepidâ animi constantiâ; memins Te Almæ Matris commodo, vitam totam, nedû vires debere. Signatum aggressus es iter, hinc affectuum numeroso stipatus satellitiô; illinc dolore Confiarum ob Tui absentiam (quasi triennium illud longanexurum esset sæcula) comitante: Provinciâ verò illa ob Tui adventum, plurimum sibi ominante, spondente. Cujus ut primum frontem aspexit; illico pulchram sibi & Academicæ illi gratulata faciem, per Tui præsentiam ad vota sua exhilaratam. Et non immerito: si enim tempus illud revolvi permetteretur; videretur imprimis; quanto animorum concursu, Magnatum æstimatione, Tuo muneri præfuiſti. Quantum à Te laboratum est, ut Pinus Lubranſciana, in suo, non modò conservaretur, ast etiam augmentaretur vigore, nominis illibati flore purpurasceret, cum selecta gloriæ auxesi cresceret. Novisti perbellè, quomodo primi Mobilis agitatione, reliquæ sphæræ necessitate quâdam rapiuntur, feruntur; adeoq; laboris scholastici prima norma, primum exemplum fui-

D sti;

sti; unde in Professoribus laboris amor, in educanda Juventute sollicitudo, in deductis privatim ac publicè literarijs ludis æmulatio, regularis in omnibus progressus servabatur. Huc accedebat suavis in dirigendo potestas, amabilis in tractando authoritas, æstimanda in commonendo gravitas, gregis commissi reciprocus amor, diligentia. Et quamvis poteras nonnunquam, justà indignatione moveri, æquali pretiò temeritatem pensare; moderatio animi effecit, ut pro vindicta, benevolentia utendo, plura impetrares modestiâ, quàm imperiò & violentiâ. Molestabant sæpiùs mentem congestæ curarum multitudines, adversi fortunæ casus premebant; non tamen in suppediandis Tutorum necessarijs contractum egisti Zenonem: manum de tabula, in reficiendis laborantium viribus non subtraxisti. Gravabat adversa valetudo, duplici Lunæ ætate, in lectulo detineri cogebat; quid tunc acerbius erat, an Te, condolente prospectare pupillâ; an de rebus Coloniae sollicitum, anxium videre? Non concidebas animò in promovendo Loci commodo, quamvis viribus lassus, ac penè destitutus fueras. Acerbitatum morbi, remissionem dicebas; dum de lectulo doloris à Lectione Juridica non desistebas; potissimam consolationem habendo; cursum Scholarum ordine non intermisso fluentem, aut videre, aut saltem pro certo audire. Non tam Te Tua fata premebant, quamvis ferè totò trienniò, scopus ad sagittam eorum fueras; quàm Professoris alicujus infesta sanitatis aut vitæ conditio: unde dictitabas sæpiùs: malle se adversitatibus premi, quàm Professorum adversis indolere vicibus, eorum tristi conturbari vultu. Tantus erat Professorum amor ac æstimatio! hinc quidquid gloriosè actum, Tuum erat:

rat: quidquid sedulô frontis effusum sudore; in Te
velut totius causati originem & fontem redunda-
bat. Conservabit præconia Tua, Academia illa;
quam non tantum in conservato ejus honore, ast
ad ruinam vergentem, sat firmiter fulisti. Canet
pietatem, in Dulce Præsidium Cumenq; Regni
Lechici, Orbis Literarii Patronum, CANTIUM;
cujus Icona, in prima fronte Academiae, non par-
cens incolæ loci, tenuitati, depingi curasti. Di-
cent de Te omne optimum Theses Theologicæ,
quas in plurimis disputationibus, inter docta Sa-
crarum Familiarum Agmina, dexterrimè oppu-
gnasti. Perorabunt & perorant laudes Tuas, for-
matæ Divorum panegyres; quas sacer Ecclesiastes,
è publicis exedris, facundissimè concinnasti. Æ-
stimabunt sicut æstimavere svadam Tui, Regni Pro-
ceres; quâ Præfecturam Majoris Poloniæ possi-
dentes binos Generales, PRZEBENDOVIVM
scilicet & SZOLDRSCIUM, cunctorum arrectis
mentibus, salutasti. Verbô, si omnia Tui recen-
serem illo sub climate gesta; dicerem, quod singu-
la, perennes Tibi exhibent laudes, promunt ado-
ream. Hanc adscripserat, ingens illud Ecclesiæ &
Patriæ Decus, Illustrissimus olim & Excellentissi-
mus Dominus JOANNES TARLO, Episcopus
Posnaniensis; qui, sive in arduis Coloniae negotijs,
sive in familiari Tecum colloquio, frequenti ac-
cubitu, gratiosum se Tibi exhibuit. Hanc vide-
rat, norma Cleri & exemplar virtutum Illustrissi-
mus olim KAZNOVIUS, EPISCOPUS Domiti-
opolitanus, SUFFRAGANEUS & OFFICIALIS Ge-
neralis Posnaniensis, non solum inde; quod Judi-
ciorum Ejus Assessor continuus, legum & justitiæ
amans fueras; sed etiam, quod ei in pluribus Diæ-
cesis difficultatibus, amicitia constanti, prudentia

extiteras probatissimus. Hanc agnoverat Illustris-
simus olim & Excellentissimus Dominus MAT-
THIAS à Radomicko RADOMICKI, PALATI-
NUS Posnaniensis, non solum inde, quod Te ve-
lut Pater filium, in causa Coloniae ad Tribunal Pe-
tricoviense tendentem susceperat, expediverat, in-
stantiis recommendaverat; sed quia Tui obtutu
semper frui gaudebat, eò majori cum dolore; quod
Eum annis & laboribus Reipublicae confectum,
invida fata Tibi eriperent. Hanc plerique Statu
utriusque Viri, communi animorum adjudicabant
oraculo; quibus eò tristior occasus Tuus in Or-
be Majoricae Polonae videbatur; quò clarior ap-
paruerat ortus, meridies affabilior, jucundior. Fu-
eras enim plurium amicorum, quam in officio Di-
rectorali peractorum dierum: cum tempore, be-
nevolentia accedebat amplior, & quò plures exe-
gisti horas, eò majora sentiebas affectuum incre-
menta. Unde, quorum corculum & animam gere-
bas, eorum cum Tui Cracoviam reditu, vitam auferre
videbaris; quorum invisceratus amicitiae extiteras;
optimam partem ademisti, dum Tui privati con-
fortio. Rediisti itaque munere Directorali, sat stre-
nuè, sat gloriosè gesto, ad Fontem; à quo, plus
quam fortunam Caesaris vehens, peculiari diver-
teras alveo. Rediisti ad sinum Almae Matris Uni-
versitatis; quae Te pleno affectus gremio sicut ante
foverat; sic redeuntem laetabunda suscepit. Un-
de, post expeditum tam celeberrimè in via Juris ad
Coronam processum, vix ad Generalia Reipubli-
cae Literariae comparuisti Comitia; facta conspi-
ratione votorum, peremptoriè decisum; ut bra-
vium id, ad quod laboriosis currebas passibus ac-
ciperes, ac in hoc subsellio ultimae instantiae, per
labores & merita currens, ad Doctorem in Ju-
re

re Lauream, causam lucrareris. Autumnus hic affectuum, traxit quidem Te in Decembrales asperitatum ferias; ast illas tolerare ludus Tibi & lusus fuerat; utpote experiëntiâ edocto: nucem fractam, adhuc tenuiori denudandam esse coriolô, ut sapidius edatur: rosam cum flore carpendam, inter spinas latere: coronam sinè prementi contactu non haberi: nec dulcia gustari, à non prælibantibus amara. Ubique triumphantem causam, etiam testibûs firmâsti; dum Licentiam ad capeffendum præmium Laboris, cum dilucidata de Testibus Quæstione obtinuisti: ac tantis de præmissis Executoriales, lati à Sacra Themide decreti experiris. Eas Tibi gratulari plures desiderabant, quam ad nunc gratulantur: nam modestiæ conscius, elegisti non festinandum esse, ubi res ipsa pro certo haberetur. Stetisti in summo Juris gradu ad Doctoralem in Jure Honorem, non tamen Olympiis Tuis metam, non plûs ultra præfixisti; ut in via laboris, animi laxare habenas desineres. Etenim pro cultu MARIANO in Arenis stetisti Orator, & ex sacris Exedris MARE GRATIARUM, Visitationis solemnia concludendo, ore fluido celebrasti. Hæc & plura alia, in Te videre, optaverat diebus suis Vir Magnus, quô, in Orbe Literario non surrexit Major, Perillustri olim Clarissimus & Admodum Reverendus Dominus M. JOANNES EKART, Utriusq; Juris Doctor ac Professor, Ecclesiarum; SS. OO. Collegiæ Cancellarius, &c. &c. sicut & Lauream Juridicam; ad quam affectu suo Tibi præiverat. Remoratus es vota Senis per omnia venerandi; Ejus interim cliens, quàm Con-Doctor esse volendo. Unde, urgentibûs ad Superna fatiis, ultimo spiritu in manibus Tuis refedit, in eis agonem vitæ finiendo,

E
olym.

olympia ætatis suæ, Tibi continuanda reliquit. Id
fatetur KONIUSZENSIS ECCLESIA in Te Suc-
cessore JOANNIS; tot recentibûs ornata decori-
bûs, supellectilî sacrâ, ditata; sonantibûs gloriam
Altissimi perorans Laudibûs; quot Cultibûs, Do-
mus DEI sanctitudo vigere cupit, devotione Tuâ,
ampliata. Crescere hanc fecit, in collatis, seu
potius effusis in Te favoribus, Gentis Sarmaticæ
Corona, Illustris ac Magnus Dominus JOSE-
PHUS de Otffinow OTFFINOWSKI, Capitane-
us Szczerczoviensis, Vir in Magnis Aborigeni-
bus, ornatissimus; in antiqua & Nobilissima GRY-
PHORUM Familia magnanimus, sicut virtutum a-
liarum; ita pietatis in DEUM, generositatis in
homines Accrescens JOSEPHUS. Sit hystoriarum
labor, GRYPHOS quondam ante Reges Ægyptio-
rum præferri, quod cum nato in cordibus eorum
unione, corda Regum cum populo unirent. Id
extra omne Symbolorum genus verum est, mo-
rum comitate, rerum prudentiâ, affabilitate OTF-
FINOVII, cunctos in venerationem Ejus attrahi:
unde condignû, ut Nomini Illustrissimorum GRY-
PHORUM cognatus honor, in Domo hac Subsel-
lia Amplissima cum Majestate firmet, unita sibi Nu-
minis Supremi experiatur hilaria. Quippe, emi-
nentem summitate sua, Ecclesiam illam, altius e-
minere causavit; dum Te in Pastorem Loci illius
assumi præ aliis primò censuit; qui Religione ac exé-
plari vitâ, Ovile commissum pasceres, nutrires ac re-
geres. Quod ne assentatoriè loqui videar; testentur
Sacra Exedra, ex ijs promanantes ore Tuo, san-
ctioribûs evolutæ paginîs edisserant voces, quàm
saluberrimum exhibeant pastum, mentes æternita-
tis sollicitas, ad palatum saginent. Equidem ne-
minem Ovilis illius conscium dixerim; qui sive no-
bilibiori

biliori Sangvine dives, five communiori adstipulatus auræ, veri Pastoris rem & nomen adesse Tibi non profiteretur; qui & Altaria cogitans exstruensq; & egenorum inopiæ subveniens, utrumq; pari alacritate exequeris, utrumq; sumptuoso opere adimpleres. Æstimatio Tui apud singulos, ea est; quæ filiorum in Patrem: amant & verentur; scilicet: ne de officioso cordium vectigali quidpiam denegent, certant amore: ne Pastoris corrigiam rumpant, vel sereni vultus offendicula inveniant, verecundiam servant. Majorem æstimationem Tui inter numerosas Cælituum Legiones, Principes Ecclesiæ formant; Eorum Ædes dum adornas, vigili curâ in speciosiore reformas florem; efficiunt, ut ornamentum Cracii Academi, copiosis Cælestium Charismatum rosetis vivas, vireasq; secundus.



Sed justumnè exili sepiæ, fontem laudum Tuarum exhaurire? cùm ille novis pedetentim ebulliat rivulis; Tua verò modestia, alti silentii denso obruat eum pulvere. Sufficiat igitur Te Neo-Doctorem hac brevi prosequi paginâ; quæ sicut echo, vocem: speculum, solem: fructus prodit sementem; ita repenso amore, amoris expensas præsentat officiosa. Per labores & merita, viam Juris ad Doctorem expedisti Lauream; necesse est, ut pro Te vota laborent faventia; in Jure utroq; Laureato Capiti, vernantem auspiciatissimis successibus coronam, pro more suo, oblatura. Ad hanc invitat Te Paternus candor Viri & Senio venerandò & Literarum continuò Studiò Magni, Perillustri Clarissimi & Admodum Reverendi Domini M. GASPARI TOPINSKI, Utriusq; Juris Doctoris & Professoris, Ecclesiarum; Collegiatæ SS. OO. Cracov: CUSTODIS, S. NICOLAI ad Cracov: PRÆPOSITI, &c. &c. Tibi intrinsecus,

sicut à primo Vitæ Academicæ diluculo intimus, ita
omni momentò dierum gratiòse præsentissimus;
ut pote Cui amantissimum est Te in Auge hac for-
tunatum in utroq; Jure spectare Doctorem. In-
vitat Te & Almun Sceptringeræ Matris Universita-
tis Gremium; cui quia optatum extiteras ac ad præ-
sens exstas delictum; honori Tuo applaudendo, con-
gregato universorum Doctorum ac Professorum
Ordine, Scepbris decorata suis, Te in Sedem Docto-
ralem deducit. Invitat Te vel maximè amplissi-
mus favor Gratiani Academici, Viri de Ecclesia
& Republica Literaria meritissimi, re & nomine
Joannis, Perillustri & Reverendissimi Domini D.
M. JOANNIS LUKINI, Utriusq; Juris Doctoris &
Professoris, Canonici Cathedralis Cracov: &c &c
Tui Promotoris Dignissimi; quam quia cum Do-
ctorali recipis Biretho; ei per Annulum de-
sponsaris, osculò Pacis conjungeris; ideo fronden-
tem affectûs palmam, frondentibus cum lætitia pu-
blica floribus animorum conjungit. In quorum
prolixioribus ramis, candor fidelis, quæ inscribit,
cælum versùs est; ne tamen sinceritas Tuorum Te
lateat, legere concessum: ut prehensum Doctora-
lem Librum, tamdiu gloriosus gestias, in Laurea
Doctorali tamdiu honoribûs floreas, Doctor Ju-
ris, tamdiu faustissima cuncta jure possideas;
donec in longæva vita, sæcula coronent

Te, per labores & merita viam Ju-

ris, ad Coronam hodie

terminantem.



ts
e,
M
o-
m
o
es
er
ne
a-
ut
o
e-
y-
ri-
e-
.
.
.
.



22.000,-

3.XII.13



Bibliotheca
P.P. Camaldulensium in Bielany

Depozyt w Bibliotece Jagiellońskiej



02350

